

常山貞石志

常山貞石志卷十六

帶授朝議大夫直隸正定府知府今調廣平府知府前署大順府兵備道沈濬

元二

太極觀記

碑高七尺七寸廣三尺二十三行行四十六字行書
額題太極觀記四字正書至元八年七月二十一日
立今在縣城隍廟內縣治東城隍廟

樂城縣太極觀記

國史院權編修官鄭居敬撰并書

鄉貢進士李

玩廟題額

全真之教所來遠矣蓋太上元其始祖也以清淨自然為宗虛明應物為用後世其傳浸外道異派教異習

所謂全真者人或莫之知也獨東華君紹聖人絕羣特
邇來哲故一傳而得正陽再傳而得純陽其說稍行然
猶疑信相半迨乎重陽王公之作也乃大為激揚洪音
以倡導之而丘劉譚馬迭出一時又和而簫鼓之自是
人始知有七真之號向上諸師教教相承皆目擊道存
氣融心會挺出物表渺翩翩而獨往者也

聖朝受命崇園重道首命驛召長春丘公前席加敬垂
衢室總章之問是時天下初定民未厭服而叛命者衆
朝議將□天討以罰殛之湯火遺黎旦暮假息埃命□
鋒鏑之下丘慮蒿□共川百方周至為之曲說竟用是
獲□至有囚俘士□輒縊其冠而利其衣者一無所問

凡前漢所活無慮億萬計雖

朝廷推含圖不殺之仁要之大教有以庇之也是後真
風大扇四方傾動羨慕之心確不可奪而丘之所度門
矛布在大□□□處無之不數年芝宮琳宇金碧相望
樂城太極觀實悟真大師孫公志覺之所建也師奉太
原大家夙蘊善根生而□茹葷血□訥淳信潛孚有抱
□集虛之志年十三入道禮尊宿赤城米志元而師事
之康辰夏四月以長春手翰繼授今名就令守德興符
之喬松觀居十餘年人無議言康寅春真定路而元州
元帥左監軍韓旻智走書幣邀師主在州之修真觀扶
衰起廢土木有加焉田□□□縣達魯火赤燕提舉事

王尹尚聚耆老而謀曰是邑久罹變故土俗愚冗吾來莅政□及周暮而民尚未知化顧不有性行純懿者相觀而化之則孰知遷善之義哉遂合辭具疏清師住持是觀師亦不多讓□□而來蓋意將有以化之也觀經兵燹遺址丘墟師為之剪荆棘拾瓦礫朝經暮營日締月構雖隆寒盛暑亦不暇卹如以積年而後有成位三清於其前殿玉皇於其後堂七真於其西齋廚寮舍像設供具隨事一新至於元氏之重陽庵則又為師之別業茲不具錄真定道司美其能曰命監樂城等處諸觀事最爾之邑實居南北要衝雲賓霞友往來者無虛日師歡喜承事館穀□盡禮莫不使欣欣之色溢於衡宇

而去與夫培人之財固為己有雖拔一毛以利人而
且不為者良有間矣至元己巳春會首董君曼卿來謁
僕曰孫師之功德若是幸吾子文之石以示永久願不
俾歟僕應之曰師之視以如游雲在山空花寓目暫假
因錄特其游戲耳安用文為况鯨生常談不足以掄揚
盛美敢辭辭愈固請愈力加之有鄉曲追隨之舊義不
獲已故勉為之書

至元八年秋七月二十有一日立石 曲陽黃山楊
秀石定賈榮同刊

右記鄺居敬撰並書李玩頤題額樂城縣志太極觀
在城內縣治東明成化中知縣李文易為城隍廟額

居敬李玩頤事蹟無攷案至元十九年元氏縣重修廟學記李治撰男玩復書玩復玩頤兩人皆以卦命名玩頤疑亦敬齋之子其列銜爲鄉貢進士元史選舉志科目篇太宗始取中原耶律楚材請用儒術選士從之九年秋八月下詔命斷事官木忽解與山西東路課稅所長官劉中歷諸路考試以論及經義詞賦分爲三科作三日程專治一科能兼者聽但以不失文義爲中選得東平楊英等若干人皆一時名士而當世或以爲非便事復中止世祖時史天澤王磐許衡等屢請貢舉取士詔議而未行至仁宗皇慶二年始下詔行之據此則元自太宗九年以儒術取

士之後科舉之法後復格而不行碑立於至元八年
上距太宗九年已三十餘年玩頤豈卽木忽解劉中
所取士耶抑鄉貢之法後亦嘗行之而史失書耶記
敘道教源流有云全真之教太上元其始祖東華
君紹聖人絕業一傳得正陽再傳得純陽迨乎重陽
之作也乃大爲激揚而邱劉譚馬迭出一時自是人
始知七真之號云云攷舊唐書高宗本紀麟德三年
三月己未次亳州幸老君廟追號曰太上元皇帝
續文獻通考東華帝君姓王名元甫得老子之道以
授鐘離權權咸陽人號和谷子一號正陽子修鍊成
仙今號正陽帝君又呂巖以四月生故號純陽真人

重陽王公見金密國公完顏瑋全真教祖碑載王真
人名嘉字知明咸陽大魏村人修進士業名德咸字
世雄後入道改今名字別號重陽真人又劉祖謙祖
師仙蹟記略云嘉正隆己卯遇至人於甘河密付口
訣俟以神水大定丁亥達闐海以譚處端等七人爲
方外眷屬己丑西歸抵汴無疾而逝邱卽邱處機劉
處元字通妙東萊人譚處端字伯玉馬鈺字宜甫俱
寧海人並見續文獻通攷元史邱處機傳歲己卯太
祖自乃蠻命近臣札八兒劉仲祿持詔求之處機旣
見帝大悅又處機卒其徒尹志平等世奉璽書襲掌
其教碑稱前席加敬垂衢室總章之問是後真風大

扇蓋指此也赤城米志元事蹟無攷元史地理志保
安州隸上都路金爲德興府元初因之至元三年因
地震改爲保安州喬松觀今州志不載修真觀在元
氏縣西北唐開元中建見畿輔通志碑有眞定路西
元州元帥左監軍韓智西元州之名不見元地理志
志惟載安平縣太祖十九年爲南平州太宗七年改
爲縣武強縣元初爲東武州太宗六年改爲縣修真
觀旣在元氏則西元州爲元氏無疑當與南平東武
同時創立不久革去史志失載得此可補輿地之闕
矣韓智無攷金史百官志都元帥府天會二年置
和六年改爲樞密院都元帥一員正一品左右監軍

各一員俱正三品元志無監軍之職此猶國初沿金舊制耳

無極縣廳事題名記

石高一尺七寸廣三尺四十一行行二十三字
正書至元九年七月望日立今在無極縣署

無極縣廳事題名記

大元以神武定天下寵功裂土犬牙藩衛其官制民賦
生殺予奪咸專一方真定在河朔為雄鎮 史氏昆

季當危難之際極力主之加以從事征伐勤勞

王家故得世爵其所以無淫刑無內政無子弟之橫無
嬖幸之權而又能化及州郡者皆今 開府相君作
法之良也龍飛中統號令一新遷調之制次第及之遂

使天下大官小職咸知名器自

朝廷出至元戊辰崧以省掾受尹無極奉檄之日先考
郎中府君喜曰吾以老朽忝仕秋官幕今與吾子得歸
鄉里況我大父臨海府君嘗為是宰汝拜此職豈偶然
邪予無他言但母忝乃祖耳崧到官歷攬山川土地人
物風俗固自佳郡公事之隙訪尋故實得曾大父所作
堂記曰問山暨竹谿先生篆字額李嗣立所述愍暇堂
記三石皆大父間物也從先人拜讀之餘翕諸廳壁有
疑問山堂題母極字者按地志二漢時為母極屈中山
國晉省之後魏復置隨屬博陵郡博陵深州也唐屬定州或
后改為無極景福二年置祁州周徙治蒲陵蒲陵亦祁州也

周以後皆屬中山由此推之書母字者蓋役其始也越
二年冬先君子棄養崧夙夜祇懼深自剋厲有之似之
中心如噎作室底法弗堂弗構力小任重非援而援益
恐不克負荷每欲作數語以書紳而未暇及回念縣署
舊闕題名會郡人儒吏王裕告予曰無極自古名邑兵
興以來蒞是任者披荆棘啗黎藿起垣舍復逋逃豪強
之士為力居多敢請識其人於石以視將來不亦可乎
予嘉其義乃詢諸故老自乙酉至今得四十餘人雖歲
月多寡時勢夷險有所不同然俯仰之間幾五十年或
升或沈或存或沒則此廉真傳舍耳於傳舍中託以不
朽者題名也而題名中又有朽不朽者乃在乎公議焉

往者不泯來者復續前人之跡後人之鑑此題名所以不可開也故書而書之仍以自戒至元九年秋七月望日承事郎縣尹馮崧謹誌并書

元帥何瑁

始立縣事

提領趙瑁

趙天祐

達魯火赤

禿列

月迭迷失

劉海

忽都于思

□

不花

塔海

也先忒木兒

至元四年七月到任

縣令張德

田友

馬珪

崔德用

霍冲

何伯

川 甚侃

縣尹李驛

高明

馮崧

至元五年十二月到任

縣丞張諫

郭進

龐進

閆亨

李茂

徐禎

張隆

主簿韓順

賈楫

李德

甄國用

亢澤

閆梅

將仕佐郎至元

六年三月到任

盧滋德

進義副尉至元八年十一月到任

縣尉王義

甄全

周慶

張壽

張瑄

史璘

至元

四年四月到任

李英

至元七年十一月到任

黃山楊忠刊

右記馮崧撰并書記稱其曾大父臨海府君嘗率是
邑有所作問山堂記爲金大定間無極縣令馮翼撰
今其石尚存馮翼卽馮子翼官至同知臨海軍節度

使崧父郎中君其名不著當卽元遺山馮壁神道碑

銘所云孤子渭也崧元史無傳見元文類姚燧山南
廉訪副使馮公神道碑稱公考中書右部郎中諱渭
世稱馮孝子公之先諱由通議築松菴崧山曰崧後
更帖字壽卿中統建元時入掾中書右部爲郎故事
諸曹出皆總管判官獨抑公眞定轉運經歷換南輝
總管經歷官承事郎令眞定之無極事治考最換令
沼之曲周升奉議大夫僉山南湖北道提刑按察司
事歷官至山南湖北肅政廉訪司副使至元二十八
年卒年五十九子休復又案元好問馮壁碑謂公孫
運安尚幼運安疑卽崧之小名又記稱崧以省掾受

尹無極而崧碑謂崧以諸曹出爲真定轉運經歷其
尹無極尚在換衛輝總管經歷之後兩碑微有不同
不知何故記因無極縣官吏題名而作起於蒙古太
祖乙酉訖於元至元九年凡四十二人記所稱史氏
昆季者謂史天倪天澤兄弟也今開府相君卽指天
澤元史本傳載天澤以中統二年拜中書右丞相至
元三年爲左丞相八年授開府儀同三司平章軍國
重事碑立於至元九年稱開府相君正與史合又記
稱崧父爲秋官郎中案元百官志刑部有郎中二員
從五品掌天下刑名之政令中統元年以兵刑工爲
右三部置尚書二員侍郎二員郎中五員員外郎五

員以郎中員外郎各一員專署刑部至元元年析置工部而兵刑仍爲一部三年復爲右三部七年始別置刑部八年改爲兵刑部攷至元戊辰爲至元五年是時正復爲右三部之後崧父爲右三部郎中而得稱秋官者蓋卽所謂專署刑部之郎中也又百宮志云上縣秩從六品達魯花赤尹各一員丞一員簿一員尉一員典史二員中縣秩正七品不置丞餘悉如上縣下縣秩從七品置官如中縣民少事簡之地則以簿兼尉後又別置尉尉主捕盜之事別有印典史一員案元史地理志無極爲中縣不應置丞此碑題名有縣丞七人無典史印典史之職又記稱無極縣

隋屬博陵郡白注博陵深州也攷隋書地理志云博陵郡舊置定州大業初置博陵郡治鮮虞統縣十有母極又云安平後齊置博陵郡開皇初廢十六年置深州太平寰宇記云深州晉爲博陵郡隋開皇十六年廢郡於饒陽縣置深州以州西故深城爲名與隋志不合記以博陵爲深州蓋用寰宇記之說又記謂景福二年置祁州周徙治蒲陵白注蒲陵亦祁州攷寰宇記定州蒲陰縣本漢安國縣隋改義豐唐萬歲通天二年改立節神龍初復爲義豐皇朝改蒲陰並無蒲陵之稱惟歐陽忞輿地廣記云無極縣景福二年置祁州周徙治蒲陵皇朝景德元年來屬崧蓋承

歐陽氏之誤耳記後題名元帥何瑁題名下旁注始
立縣事四字元薛泰何體仁墓碑云曾祖瑁濠州人
元初爲黑軍元帥收撫郡邑屢有功績授無極縣軍
民長遂家焉祖伯川襲瑁職至元二年遷轉世襲官
調彙城深澤臨邑曲陽四縣尹所至有能名當卽其
人趙瑁列銜爲提領攷百官志凡各庫各局各市油
麪等戶抽分場木場茶園金銀場人匠總管府稻田
大都等路民佃冀園龍慶州等處田賦法隣口地方
皆置提領又管領大都路打捕民匠等戶總管府管
領諸路打捕鷹房民匠等戶總管府管領諸路法隣
口民匠都總管府汴梁路管民總管府管領諸路打

捕鷹房納綿等戶總管府其屬各置提領所分設各
管路府州縣境內其置在中山者惟管領打捕鷹房
納綿等戶提領所一大都中統以後所置碑題趙瑫
名在何瑫下當同是太祖太宗時人其官卑於元帥
案圖復王慶端神道碑銘謂慶端嘗爲水軍提領與
此當同一軍官但慶端專轄水軍此或兼管軍民也
又金史謂元光時招義軍設總領提控等官提領疑
卽同時所置元初多襲用金制此類是也元史列傳
有趙瑫雲中蔚州人累官至中山真定二路達魯花
赤太原路總管燕南河南等道提刑按察使卒贈儀
同三司太保上柱國追封定國公諡襄穆未知卽此

趙瑄否縣尉王義與元史列傳之王義當別是一人
又記稱崧以至元戊辰受尹無極越二年其父卒記
不言其以父喪去官題名內於崧名下旁注至元五
年十二月到任此下別無受代人姓名知崧遭父喪
未嘗去職攷元史選舉志凡官員給假至元二十七
年議祖父母父母喪亡并遷葬者許給假限限內俸
鈔擬合支給違例不到停俸定罪大德元年議雲南
官員如遇祖父母父母喪葬其家在中原者並聽解
任奔赴二年詔凡值喪除蒙古色目人員各從本俗
外管軍官并朝廷職不可曠者不拘此例又成宗本
紀大德五年詔廉訪司官非親喪遷葬及以病給告

者不得離職或以地遠職卑受任不赴者臺憲勿復用六年詔軍官除邊遠出征其餘遇祖父母父母喪依民官例立限奔赴泰定帝本紀致和元年夏四月己亥塔失帖木兒倒刺沙請凡蒙古色目人效漢法丁憂者除其名從之文宗天曆元年即致和元年十二月戊午詔蒙古色目人願丁父母憂者聽如舊制據此知至元二十七年以前官吏遭喪并無給假之例其不許丁憂去官可知攷元官吏丁憂之制史不言其起於何年惟梁曾傳有云大德元年除杭州路總管四年丁內艱先是丁憂之制未行曾上言請如禮七年除潭州路總管以未終制不赴據此知丁憂之制

因梁曾奏請始行是行於大德四年然選舉志有大德二年領喪各從本俗之詔又趙世延傳元貞元年除江南行御史臺都事丁內艱不赴云云是又在大德以前攷元典章載大德八年詔書節該今後除應當怯薛人員征戍軍官外其餘官吏父母喪亡丁憂終制方許敘仕又有大德九年湖廣行省准中書省咨官吏丁憂聽從一件蓋大德以前雖有官吏丁憂之制其去官與否尚聽自便著爲令甲則自大德八年始矣

重修水仙菩薩題字

石高八寸四面每面廣五寸五分兩面無字第一面題水仙菩薩四字後題年月一行第二面題村名一

行記四行字不等並正書至元十五年建
今在元氏縣吳村東南隅龍王廟後殿中

水仙菩薩

大元至元十三年重修

記不錄

右題字文理不順足資嗟嘆蓋鄉曲陋夫所爲也水
仙始末縣志不載攷太平寰宇記瀛州高陽縣聖姑
祠邢子勵記云聖姑姓郝氏字文君魏青龍三年焦
於滄徐二水合流之處忽有數婦人從水出曰東海
公聘女君爲婦故遣相迎因施茵褥置女君於上順
流而下其家大小皆涕泣遙望莫能就女君慘然曰
今幸得爲水仙願勿憂憶語訖去漸遠因爲立祠云

云興太平廣記女仙五引莫州圖經相同則水仙菩
薩當卽郝姑

元氏縣建福院記

石高二尺四分廣二尺二分二十四行行二十七
字正書至元十四年三月十九日立今在元氏縣

大元國真定府元氏縣上鄉毛遺村建福院記

記不錄

右所鐫院記庶有補於將來志取垂遺後世住持行道
輩永頌

佛教興隆法輪常轉者矣至元十四年歲次丁丑三月
庚寅朔越十九日戊申元氏裴震謹記

右記裴震撰并書裴震元氏鄉貢進士見至元十九

年李治撰元氏縣重修廟學碑記碑陰題名文庸陋
故不錄

贊皇縣學樞密院榜文

石高二尺四寸廣三尺五寸十六行行字不等正
書末題至元十四年十二月日今在贊皇縣學

皇帝聖旨裏樞密院今本院趙同簽於真定路趙州贊
皇縣勅建

宣聖廟一所照得中統二年六月廿五日欽奉

聖旨節文

宣聖廟

國家歲時致祭恒令洒掃修潔今後禁約諸官員使臣
軍馬無得於廟宇內安下或聚集理問訶訟及褻

瀆飲宴管工匠官不得於其中營造建者治罪欽
此樞府全出榜省諭諸官員使臣軍馬及不以是
何諸色人等欽依

聖旨事意施行毋得違犯須至出榜者

右榜付贊皇縣

宣聖廟曉諭通知

榜

至元十四年十二月日

右榜文無立石年月末一行乃樞密院出榜歲月也
榜文第一行樞密院三字本院二字趙同簽三字十
一行人等二字上各蓋印一又年月上連蓋五印印

文係蒙古國書不可議當卽樞密院之印攷元制一品衙門用三臺金印二品三品用兩臺銀印其餘大小衙門印雖大小不同皆用銅其印文皆用八思巴帝師所製蒙古新字見王圻續文獻通攷元史百官志樞密院秩從一品掌天下兵甲機密之務凡官禁宿衛邊庭軍翼征討戍守簡閱差遣舉功轉官節制調度無不由之其官有同簽大德十年增置三員至大三年省存一員後定置二員正四品趙同簽卽趙良弼字輔之女直人本性木要甲音譌爲趙家因以爲氏初舉進士教授趙州遂爲贊皇人累官同簽樞密院事卒贈推忠竭運功臣太保儀同三司追封韓

國公謚文正事蹟具元史本傳又傳稱夏弼以至元十一年十二月同簽書樞密院事屢以疾辭十九年得旨居懷孟榜出於至元十四年稱夏弼爲同簽正與史合王磐重修贊皇縣廟學記縣嘗有學金季毀於兵推存一堂僉樞趙公家居率鄉人重修嗣後趙公仕宦四方廟貌無復修理至元十三年趙公盡以家之所有別買地建立又立贍學地五頃贊皇縣志亦稱學爲趙良弼所修復又榜文內載中統二年六月二十五日欽奉聖旨節文云云案元典章載詔旨每稱聖旨節文聖旨節該蓋當時之制如此

元氏縣重修廟學記

碑高六尺二寸廣二尺八寸二十六行行四十四字
正書篆額有陰至元十九年七月十五日立今在元
氏縣學

重修廟學記

具定府元氏縣重修廟學記

前翰林學士知制誥同修國史李治撰男玩

復書丹進士李企篆額

泰和中胡沙席知大興府事蔑棄王法虐殺不辜我先
人東平府君列職帷幕不忍庶幾之橫日爭曲直席積
闕怒欲陷先人死地誣以借向漢人先人亦慮若折外
破盡遣幼弱還里問當時治垂髫兒因挾書從師元氏
縣學中常顧見其禮殿巍如兩廡翔如論堂邃如齋房

縝如門指閣如垣墉環如園圃縛如豐碑矗如高樹蔚
如然目擊其盛美而童心潛其所以為美也爾後之河
間之遼東載之燕之關中之京洛川途逾萬里日月逾
兩紀曉然悉其所以為盛美者奈之何干戈之門而斯
文之昧昧也俗專以健闘為雄官切以武功命爵視序
序之有無不足以與吾事是宜巍者庠荆者鍛選者器
縝者剝闕者夷環者圯縛者榛蠹者仆菊者鬣萬方一
槩未始有別也壬辰北渡寓跡太原竊謂彬蔚之風沒
齒不復見而

詔旨丁寧令之闕學館復儒戶者無曠歲意忽大快以
為橋門冠帶匪朝伊夕及閒過山東故人問元氏廟學

乃猶在一槩之例反更戚焉不樂雖然私心眷眷於舊
游之地擬之以為菟裘計者未嘗須臾忘之歷鞅掣人
歲辛亥僅獲宿昔之願首謁宣聖祠則其所見乃與所
聞大不同凡鄉之所謂盛筵者莫不橫陳乎其前惟是
翔如遽如者少變於曩時焉卽所見而憶所聞深疑說
者之誕周爰咨諏乃知既壞而復者實在於己酉庚戌
之交大府都祭酒張德輝倡率之教官王昱平天瑞鄉
耆張誠輩作新之彼說者之不同特未覩其巨麗耳曾
中之疑固已渙然冰釋矣少變於曩時者猶之為甚病
歲乙卯彥明輩復與邑丞鄭圃董輔君謀之無幾何
鍛者翔而剝者遽矣已而都祭酒喜厥功之克卽會諸

君落之孔偕孔嘉客有舉大白屬治者曰

聖上恢張文治

陶鑄士類

有經緯

兩儀之德茲不可以無述一也作者振起墜緒撰錄梓材有扶持素教之勞茲不可以無述二也子童也書於斯讀子老也居於斯卜中廢覽懷今興溢目茲不可以無述三也合是三者子盍以文揭示後之賢令長泉邑中之儒衣冠與夫樂於為善而勇於為義者使時時而踵修之以逆黜其庠黜黜夷圯榛仆翫藎之患不其偉而治不敢以不敏辭於是次其所見所聞而復作歌以系之曰

屹彼西山蒼兮雲行靈雨其零草木怒生

皇帝御極 顯猷允塞壁度奎躔維民之則載新辟雍
泮水攸同曰儒不征風動萬邦邑槐之陽廟學自昔旣
闡孰章旣傾孰葺子張子是經昱瑞是營誠也是攻董
子演成有客有客嘻能事畢亟伐堅珉騰茲茂實天地
三綱古今五常豈獨齊魯擅禮義之鄉道不遠人可離
非道金石有聲聲在擊考宮從則諧否則越乖式告來
哲尚其嗣哉

縣尉王延祚 進義副尉主簿程仲昌 承事郎元
氏縣尹兼諸軍奧魯井陘耿鏞立石

皆至元十九年七月十有五
日忠翊校尉達魯火赤
兼諸軍奧魯拜都同立石
李義李郁刊

右碑李治撰男玩復書丹李企篆額元史治傳治晚
家元氏買田封龍山下學徒益衆及世祖卽位復聘
之欲處以清要治以老病懇求還山至元二年再以
學士召就職期月以老病辭去故此列銜有前字玩
復爲治子史傳不載李企後官眞定府儒學教諭見
大德五年元氏重修廟學記碑陰又碑載泰和中胡
沙虎知大興府事蔑棄王章虐殺不辜東平府君列
職推幕日爭曲直虎積怒欲陷先人死地誣以借向
漢人云云泰和爲金章宗第三紀元胡沙虎一名紇
石烈執中見金史逆臣傳其知大興府事在泰和四
年亦載本傳李治父名通字平父號寄菴金史無傳

見元好問中州集小傳遺山集有寄菴先生墓碑云
泰和賊臣胡沙虎尹大興先生爲府推官虎方謫中
貴竊弄威柄同列不叶者不陷之死地則排諸遠方
先生直前徑行每以公事相可否不少貸又摘其陰
事數十條將發之虎先以非罪誣染之凡可以中傷
者無所不至如是二年旣無可撼搖乃奏之上前謂
先生於種人有奴視之傲賴上雅見知譖不得行云
云正與此合碑又有壬辰北渡寓跡太原之語案壬
辰爲金哀宗天興元年哀宗本紀載是年蒙古圍汴
京十二月庚子哀宗出奔元史治傳云壬辰城潰治
微服北渡流落忻崞間正與碑合張德輝字輝卿冀

園交城人號爲龍山三老至元十一年卒事蹟具元史本傳及元朝名臣事略傳言德輝金亡北渡史天澤開真定辟爲經歷官而事略云後升真定府叅議微有不同碑後題名有承事郎元氏縣尹兼諸軍奧魯并陘耿鏞忠翊校尉達魯火赤兼諸軍奧魯拜都耿鏞見正定府志元文類經世大典政典軍制篇軍出征戍家在鄉里曰奧魯州縣長官列銜兼奧魯官以莅之世祖本紀中統四年正月甲午立十路奧魯總管至元九年十二月乙酉朔詔諸路府州司縣達魯花赤管民長官兼管諸軍奧魯又十七年十二月丁亥復詔管民官兼管諸軍奧魯又兵志至元九年

十二月命府州司縣達魯花赤及治民長官兼管諸
軍奧魯各路總管府達魯花赤總管別給宣印入信
府州司縣達魯花赤長官止給印信任滿則別具解
由申樞密院拜都府縣志不載

碑陰

十七行行字
不等正書

元氏縣在城坊司魏元咎 閔梅 坊正楊天祐 陳
祐

神巖鄉鄉司安仲民 里正孫成 龍泉鄉鄉司蘇
彰 里正雷德

仁孝鄉鄉司張忠信 里正賈政 仁德鄉鄉司曹

仲仁 里正張興

吏戶禮三案吏員樂城郭珪 王亨 牛瑁 前吏

員張琚 王行忠 岳吉甫

主案何天祺 趙鑑 郭從善

兵刑工三案吏員葉城蘇諒 王守謙 王守貞

前吏員劉茂 張伸

主案李友直 劉國傑 馬裕 朱恕 賈璘

招撫斐欽 高顯 郭瑛 宋明

封龍山□□所提領 大使何汝舟

管民千戶孟天祥 副千戶續珎

典史員定邢德澤 前提舉閻濟 前提舉高彬

前典史何澤 典史續祐 典史楊榮

醫學教諭董麟 儒醫楊德 劉翊 王道沖 何

良 蘇善政 于恕 王大椿

教諭郝從龍 鄉貢進士張彬 裴震 麻思明

王佐 張彪 郭珪 張維

曹柔 王知微 平殘 高在安 賀宗儒 趙德

輔 楊榮 杜觀國 李浩 李黃裳

前進義副尉樂陵主簿陳好禮 將仕郎建德路知

事蘇恒

元氏縣三務大使王文玉 副使葛國斌 前興魯

鎮撫蘇彬 三務司吏裴諒

右題名有吏戶禮三案吏員主案兵刑工三案吏員
主案等人吏員當卽元氏縣司吏其云吏戶禮三案
兵刑工三案者攷元中統初六部未分以吏戶禮爲
左三部兵刑工爲右三部又各行省郎中皆分左右
司故縣吏亦倣其制不分爲六案也又有招撫四人
封龍山□□所提領大使一人招撫未詳何職提領
見元史百官志又有鄉貢進士張彬元史河渠志皇
慶元年七月省委工部員外郎張彬巡視渾河未知
卽此人否元世鄉貢之法史言自太宗九年命劉中
等歷諸路考試之後事復中止世祖時屢欲行而未
果至仁宗皇慶二年始下詔行之碑立於至元十九

年而張彬等共十七人則當時中選者宜不止此元氏一縣一科中選者亦未必如此之多然則太宗以後仁宗以前貢舉之法疑嘗行之史或軼之歟裴震見至元十四年元氏縣建福院記王知微後爲元氏儒學教諭見大德五年元氏重修廟學記碑陰又有三務大使一人副使一人百官志無嘗卽稅務使元史馬紹傳時更卽至元鈔前信州三務提舉杜璠言至元鈔公私非便云云是也百官志諸路總管府有稅務提領一員大使副使各一人三務云者商稅酒醋是也選舉志凡稅務官升轉至元二十一年省議應敘辦課官分三等一百錠之上設提領一員使一

員五十錠之上設務一員五十錠之下設都監一員
十錠以下從各路差人管辦又有前與魯鎮撫一人
案世祖中統四年立十路與魯總管府至元九年始
令路府州司縣官兼管與魯事此當是與魯總管府
屬蓋蘇彬當未罷與魯府時曾爲此官爾

本願寺遇天尊勝施羅尼經幢

幢高三尺五寸四分八面每面廣六寸第一面題住
持本願寺遇天尊勝施羅尼經幢十四字其餘每面
八行行字不等末面題年月一行並正書至元二
十二年四月八日立今在獲鹿縣城內本願寺

佛頂尊勝施羅尼經

經文不錄

皆大元至元二十二年歲次乙酉四月上旬有八日

衆門資

建

無極縣文廟四至記

碑高六尺廣二尺二寸二十行行四十一字正書篆額至元二十二年八月立今在無極縣學

文廟四至之記

縣學教諭趙琦撰

阜平教諭何南午篆額

將仕郎江州錄事前本縣教授馬仲璉書丹

東至南北巷道南至東西巷道西至高典史宅北至
東西街道南北長六十三步東西闊三十二步計地
八畝四分廟前巷道自三門直至正街長五十七步
闊三步半

竊謂申畫郊圻周書垂訓正立經界亞聖有言蓋經界
既正自忘侵奪之患而有一定之規矣無極縣學厯年
既多界畔鹵莽前朝士大夫雖以四至記之于石奈歲
久毀壞文僅存而至不明目濫侵占莫之能考○至元
癸未夏四月令尹完顏瑄來宰是邑公廼前

宣差中山府達魯火赤完顏禿薛之弟四子也父鎮名
藩子臨屬縣豈偶然哉公到任日首拜

宣聖顧殿宇聖像俱未完備弦誦堂幕天席地慨然
有規恢之志逮甲申春尹乃率士民成繪事聖賢容儀
儼然一新人心助順所用之費綽然有餘是歲冬尹乃
以其羨餘經營磚瓦材植越明年春肇事興工○殿基

創講堂建門墻獲古井甫四旬而落成廟前空地為民
冒占尹又輟俸贖之於是復仍舊貫規模寬敞若不刻
之於石將恐歲月侵遠復不免侵削之患其創始宏華
之故已有府學作記矣然則立學校以育人才正經界
以立定限豈因循苟且之所能為哉時 吏部侍郎

楊朝列曰擊盛事以家塾文籍施之學舍樂與好事者
共鄉閭之士有堂可升有書可讀將見家詩戶書風移
俗革皆權輿於此吁有完顏尹以開其端有楊吏部以
成其美非特濱陽多士之幸亦學校之榮也於是乎樂
為之書至元二十二年歲次乙酉秋八月己未日記

直學張翼 儒人段克貞 王裕 張郁 立石

無極縣尉王伯祥

進義尉尉無極縣主簿劉泉

忠翊校尉無極縣尹兼管諸軍奧魯完顏 瑄

右記趙琦撰何南午篆額馬仲連書碑中諸人惟張翼見縣志云順帝時舉進士官國子監助教餘俱不詳元選舉志凡路府州書院設直學以掌錢穀從郡守及憲府官試補直學考滿又試所業十篇陞爲學錄受禮部付身碑云完顏瑄爲前宣差中山府達魯花赤完顏禿薛之第四子禿薛元史無傳又云吏部侍郎楊朝列目擊盛事以家塾文籍施之學舍百官

文散官朝列大夫從四品則朝列爲楊之散階縣志
謂楊名朝列官侍郎謬甚

元氏縣重建土地堂并石香爐記幢

幢高一尺六寸八面兩面無字每面廣三寸五分面
四行行字不等正書至元三十一年造今在元氏縣
城西北隅
城隍廟中

元氏縣南關重建土地堂并石香爐記 賀宗儒撰

文不錄

大元國至元三十一年□下缺

人名不錄

右記賀宗儒撰宗儒見至元十九年李治元氏縣重
修廟學記碑陰蓋元氏之鄉貢進士也文庸陋故不

錄

獲鹿縣創修白鹿泉亭記

石高一尺六寸五分廣二尺二十三行行十九
字正書元貞三年四月望日立今在獲鹿縣

獲鹿縣創修白鹿泉亭記

鹿泉之名其來舊矣竊嘗聞之咸秦廢走神器潛伏豪傑並起跨州連郡分疆割界者不可勝數炎劉起自漢中韓信師出破三秦如電掃氛將下全趙聞陳餘不用李左車之計引軍方出井陘口師患無井筮之得蒙乃知山下有泉焉信遣胡將周而索之屈此見二白鹿跑地泉始出口之源也其泉甘美不減醴泉之味天有口道福善禍淫誠皇天降祐于漢兵也漢室成平郡人義

之於泉左立胡王神祠是其跡也是故祈禱以致感應焉本朝自天輔以來名山大川古今事跡無不□顯而新其名者近蒙

朝廷遣使汲泉煎造湯藥

諸王經過取水醞造酒漿如此見重有司忍不敬哉是泉也□靠荒村牧飲者狼籍穢污嚴行榜示難禁愚願于是邑宰承事□公淵始議創建泉亭一所以承

上□見用之意僚吏聞之無欣然樂而共謂之者咸嘉賢侯之志主於奉公謹敬也若非博雅好古之君子豈有□□邪張君誠好古者也工畢鄉耆宗嚴等屬愚曰昔者或仍或作不可無述因請以記之愚既為□□亦

不敢辭以不敏姑誌其實

大元元貞二年夏四月望日□□周義記

右記周義撰記稱鹿泉原始與唐開元二十四年章
濟所撰白鹿神祠碑互有詳略託云胡王神祠當卽
鹿泉神祠寶刻叢編有鹿泉胡神祠文唐寶曆二年
四月立來復撰并書今不知所在

重修神應王廟記

石高一尺八寸廣二尺十四行行十七字後題名六
行行字不等并正書大德元年三月立即刻宋桂府
觀察判官
蔡誌石上

記文不錄

大元大德元年季春上旬日苗莊晚學陳 徇札書

人名不錄

右記陳徇禮書文當亦其所撰辭近俚故不錄神應王不知何神獲鹿縣有至正十七年重修鹿泉神應廟碑元氏邑壤相接疑卽鹿泉神應名自稱後學見唐大厯九年朝陽巖銘此稱晚學尤爲罕見

祁林院聖旨碑記

碑高六尺六寸廣二尺七寸五分二十八行行字不等額題皇帝聖旨碑記六字並正書大德元年十月立今存
靈壽縣

大元國

皇太后懿旨

特遣宣政院謹敦院判騎坐驛馬賁

擎

錢目前來具定路總管府僧錄司開讀將靈壽縣大明
川三尊佛祁林院壹宗田地行分付與五臺山壽國
寺為主見有寨頭村社長邢德主首辛與俱係本縣軍
戶指說所擬三尊佛名幽居寺祁林院四至山庄栗蘭
桑棗地土東至漫漢石南至滋河水心西至口巷清水
心為界西北至馬般砲北至分水嶺東北至朱山寨分
水嶺已上四至俱係祁林院物業其間並無軍民地土
等物所供口實 大德元年十月 日 社長邢德

狀 主首辛與

奉寺功德主 宣授具定路都僧錄山林提舉脫魯只
八 湛羊八 石曰裏維那頭辛與

都功德主光祿大夫司徒國公阿尼哥

上師三寶 瞻巴師父都住持 宣政院榜文一道

五臺山總攝所榜文一道 尚書禮部榜文一道 將

作院榜文一道

僧名不錄

右碑額題皇帝聖旨碑記而記中不云有聖旨惟有
皇太后懿旨案祁林院延祐元年沙門明亮撰歷代
聖上恩慈撫護碑謂大德丁酉十月內具資准隱產
事上達椒闈皇太后特遣掌管天下僧官衙門宣政
院判謹敦相公賁肇懿旨馳驛前來眞定府開讀將
祁林院一宗田園盡行付壽闍寺依舊爲主云云記

中所載卽此事也碑無立石年月皇太后卽裕宗妃伯藍也怯赤一名濶濶眞因吉刺氏生順宗成宗成宗卽位尊爲皇太后大德四年二月崩謚裕聖皇后升祔裕宗廟至大三年十月又追尊謚曰徽仁裕聖皇后事具元史后妃傳宣政院判謹敦無攷元史百官志宣政院秩從一品掌釋教僧徒及吐蕃之境而隸治之遇吐蕃有事則爲分院往鎮亦別有印如大征伐則會樞府議其用人則自爲選其爲選則軍民通攝僧俗並用元初立總制院而領以國師二十五年因唐制以吐蕃來朝相見於宣政殿故更名有院判元貞元年置一員後定置三員正五品碑云大明

川三尊佛。祁林院又云五臺山壽寧寺。又云三尊佛。名幽居寺。案幽居寺卽祁林院所云三尊佛者。當因北齊趙郡王高澄所造釋迦像無量壽像阿閼像得名。五臺山壽寧寺案恩慧懺護碑。清涼山卽今五臺中臺之下有古名剎。扁曰壽國云云。五臺縣志臺山佛刹有壽國寺古名王子焚身寺。卽此阿尼哥波羅國人共國稱之曰八魯布善畫塑及鑄金爲像。中統二年從帝師八合斯巴入朝受具爲弟子。凡兩京寺觀之像多出其手。至元十年授人匠總管銀章虎符。十五年返初服授光祿大夫大司徒領將作院事。卒贈太師開府儀同三司涼國公上柱國諡敏慧事詳

元史方技傳贈巴附釋老帝師八思巴傳一名功嘉
葛刺思西番突甘斯旦席人幼從西天竺古達麻失
刺傳習梵秘得其法要中統間帝師八思巴薦之號
國師大德七年卒皇慶間追號大覺普惠廣照無上
瞻巴帝師百官志將作院秩正二品掌成造金銀珠
翠犀象寶貝冠佩器皿織造刺繡段疋紗羅異樣百
色造作至元三十年始置攷元制宣政院總天下釋
教其餘總一方者則曰總統或曰總攝碑有五臺山
總攝所榜文是也記後維那等題名其地有名赤行
口者疑卽宋史地理志之赤陁岩

王善夫人李氏墓銘

碑高七尺五寸廣三尺七寸五分二十四行行五十一字正書篆額失拓大德四年十月初八日立今在縣城

故金吾衛上將軍知中山府事王公夫人李氏墓銘

翰林學士太中大夫知制誥同修國史李謙撰

翰林學士中奉大夫知制誥同修國史王惲書

丹

儒林郎秘書少監楊桓篆額

夫人李氏其先真定獲鹿楊市里人嫁豪城王氏為故金吾衛上將軍左副元帥知中山府事王公諱善之夫人其始在室也貞靜淑婉勤於女功既醮事舅姑供養惟謹克盡婦道其後公以拓地功致身帥職夫人相其

內治一於勤約未嘗以貴盛易其所守遇內外使均一
撫御勞俸恩意曲到身居千人之上而未嘗厚一己之
口故人人皆樂效口而不憚其勞歲戊戌飛蝗為苗趙
境民大饑夫人言於公發私廩以濟賴以全活者甚衆
公守永安日郡去喪亂未久公賦繁重民貧不克時輸
公從口貸子錢為補其不足責家來徵則取倍於民夫
人為公言如聞郡民負息至傾資莫能償君為牧長能
忍坐視乎我初來釐時粗有奩口之私今存焉請為民
紓急亦所以紓君之急也即盡出所有無難色積歲重
負一朝獲釋郡人德之公子男女卅餘人其諸母前口
口口人撫之不啻如己出鞠育教誨俾皆有成就著聞

于世公薨之四年夫人亦卒丙午歲二月十二日也
年四十有九是年二月十七日附公之墓一子慶端今
榮祿大夫平章政事行徽政副使簽書樞密院事一女
適中奉大夫荆湖北道宣慰使趙椿齡有賢行男孫
人桓廣威將軍

隆福宮左都威衛使女孫二人長適承事郎管領諸路
民匠副都總管趙瑜次適征行萬戶解震男□隆夫人
夙有至性其父母偕沒于兵亂後失蒸殯所在歲時追
感痛念殆不欲生詢訪故老迹其死所竟得為具衣衾
棺槨葬焉慶端嗣職戎政由右衛親軍副都指揮使入
侍

春宮為侍衛軍都指揮使建立詹事院遷秩為丞忠信
勤恪始終慎密不為智名勇功用締

眷知遂進拜今職居家清約自奉如寒素有以見夫人
夙昔之教所以成其子者至□平章狀其素行為謹□
先太夫人弄養為日久矣因極之報已無所施不朽之
傳儻可圖也敢以屬筆為請謹曩侍

春芳與平章數相周旋義不可辭廼叙而銘之銘曰
昔金吾公膺一郡之寄軫民之急發私廩以濟紆民之
急推所有以利匪惟公賢繫夫人相其內治今金吾公
都使相之位贊畫

帷幄密勿從事持身清慎始終一致匪惟公賢以太夫

人成其偉器傾我國倉說我替珥能婦人之所難維以
成君子之志勤身以先下齒已而豐施母儀嬪行周旋
克備爰摭遊行銘諸墓隧至德匪酬姑以慰九原之闕
大德四年十月初八日榮祿大夫平章政事行徽政
副使簽書樞密院事男慶端立石

右墓銘李謙撰王惲書丹楊桓篆額男慶端立石攷
李治所撰王善神道碑銘善夫人八俱不詳其里族
他氏皆未見志墓之文慶端爲李親子於貴後立此
碑王桓皇慶中世係國碑載夫人封冀國夫人此文
不載國中桓曾祖增配李及桓妻劉俱封冀國夫人
知皆皇慶時所追贈元史李謙傳謙字受益鄆之東

阿人以王磐薦爲應奉翰林文字至元三十一年陞
學士王惲傳至元二十九年授翰林學士元貞元年
加知制誥同修國史大德元年進中奉大夫與碑合
而謙傳不書大中大夫散階亦無知制誥同修國史
之文則傳之畧也楊桓傳相字武子兗州人至元三
十一年拜監察御史未幾陞祕書少監大德三年以
國子司業召未赴卒斯石立於大德四年蓋篆額在
先立石在後慶端歷官見閭復所撰神道碑銘百官
志至元十九年置詹事院三十一年改爲徽政大德
九年復此碑立於大德四年正詹事改爲徽政之時
列銜行徽政副使正與史合趙椿齡爲趙迪子元史

迪傳作眞定路轉運使此云宣慰使可補史傳之缺
趙瑜解○隆俱無攷碑末云平章以狀來請謙曩侍
春坊與平章數相周旋攷謙傳至元十八年陞直學
士爲太子諭德又命傳成宗於潛邸慶端亦於十九
年官詹事丞故云

北嶽行宮聖蹟碑

碑高六尺廣二尺六寸三十一行行六十一字正書
篆額大德四年十月立今在無極縣西關外廟中

北嶽行宮聖蹟之碑

北嶽行宮聖蹟之碑

宣授承事郎大名人匠提舉張楫譔 受降進士陳

弼書丹 鎮州安晚篆額

文不錄

昔大元歲次庚子大德四年十月吉日立石人功德
主故王聚妻張氏 同立石人□□ 助立石人路
德義 石匠楊元等

承事郎無極縣尹兼管本縣諸軍奧魯勸農事梁成
圭 無極縣尉杜元亨 典史田甫

敦武校尉無極縣達魯花赤兼諸軍奧魯勸農事阿
忽歹 進義副尉無極縣主簿楊文郁 前縣尉愛
林

右碑張楫撰陳弼書安照篆額碑紋無極縣民王聚
於至元四年薙草城西恭然僵仆數日乃蘇自云天

童祈聖治人痼疾輒愈人謂北嶽神力所馮聚死官
吏於縣西門外一里餘建北嶽廟碑蓋因頌王聚功
德而作故稱聚爲神主其言皆怪誕不經文亦近俚
故不錄楫弼無攷煦卽彙城人安熙弟熙見元史儒
學傳眞定府志煦字和仲熙弟其父子伯仲自爲師
友宗濂洛性理之學兄卒事父甚得歡心撫其孤如
己出山陝憲府交辟皆不起自號素菴楫列銜爲大
名人匠提舉案百官志大名名匠提舉司隸工部有
提舉一員弼列銜爲受降進士受降當是地名疑卽
三受降城元史地理志大同路東勝州唐爲勝州張
仁愿築三受降城東城南直榆林後以東城濱河徙

置綏遠峯南卽今東勝州是也又雲內州唐天德軍
卽中受降城之地案唐東受降城在今山西歸化城
西黃河東岸中受降城在今歸化城西三百六十里
吳喇忒三旗牧地西吳喇忒三旗俱住鐵柱谷西受降城在旗西
北又漢受降城亦在旗北陳弼當是其他人特書古
地名以標異爾

樂城縣重修廟學記

碑高五尺三寸廣二尺五寸二十五行行四十五
字正書篆額大德五年六月立今在樂城縣學

樂城縣重修廟學記

樂城縣重修廟學記

翰林侍講學士中順大夫知

制誥同修

國

史郝采麟撰

中憲大夫同僉樞密院事張浹書丹

翰林學士中順大夫知

制誥同修

國史楊

文郁篆額

樂為邑舊矣以晉大夫樂貞而顯春秋時

我朝當南北之衝地阨事殷加以民貧戶寡更以供億
幹集為能免責平遷為幸而於興學設教俎豆弦歌之
事殊未遑也逮東陽田君茂來主邑簿下車謁廟相學
顧瞻荒涼則喟然嘆曰人卓然霄壤間守綱常由禮義
生榮而死安不為蚩蚩異類者非吾夫子化育果敦力
耶遂銳意興學以故規陞隘購地于縣治之東剪荒夷

弱補功平埤以築以構期年而禮殿告成厥志未終而
及瓜以去爾後苟且相承曾不加省大德三年馬君彥
文由樞密院都事出尹茲邑君才通思敏優於理劇不
數月而政清民悅則以宣教厚俗為務乃謀於監縣渥
注石土簿張仲謙等曰凡吏于民食于民也食焉而怠
於教教而無所依歸可乎哉終前人不緒吾黨職有在
矣即捐月俸以倡其僚吏民之觀感樂善者亦皆致材
助賙源源而來晨夜展力百製並興而民不加賦事政
之餘終日董作焦勞悴困而不恤也踰年凡構兩廡神
門東西齋橋星門一十五楹像設儼備輪奐一新巍然
素王之官侔縣無有也仍禮師儒為主善召鄉邑俊秀

入學則則督諸小吏與聞講解聖賢之大義由是漸摩
樂育頤蒙者以開兇悍者以怙煦然有樂土之風焉同
食樞密院事張君子惠邑人也樂其鄉大夫之賢命予
識其事且請垂訓以勗鄉之子弟予惟古昔盛時設為
庠序學校以教之皆所以明人倫也人倫既正王道終
矣然而明倫本於身修而原於心正蓋人可以參天地
贊化育者此心而已故聖賢立教必以存心為本使人
幼而存於洒掃應對之節長而存於日用動靜之常齋
莊敬一以存其體大中至正以存其用而又窮萬理以
致其知游庶藝以宣其妙一旦自明而誠酬酢萬變觸
處洞然至於仁熟義精纖悉曲當而於財成輔相治國

平天下者固不難矣生斯時也由王宮國都下逮里閭
家塾際四海莫不有學其為制也廣故其成才也多由
束髮為士以論選賓與之法而至公卿大夫其為教也
切故其及物也深此先王化美風厚之源布之方策諄
諄致詳者歟自秦掃古蕩盡後之學者鮮不泥於訓詁
詞章惑於異端百氏誘於決科干祿甚者區區接援沈
迷奔競戕其配天之大竟罔然以死嗟夫由是觀之豈
天之生才不足於古耶學之名同而學之實異也今是
邑也方始興學教者審思之學者亦勉哉無負賢大夫
卓越有為之意可也大德五年六月既望謹記

教諭陳起宗

樂城縣尉教化的 典史肖世欽等立石 鹿泉曹

良鏞

右碑郝采麟撰張泮書丹楊文郁篆額陳起宗等立
石采麟郝經子經傳采麟亦賢起家知林州仕至山
南江北道肅政廉訪使又元文類盧摯撰郝經神道
碑載公子三人二早卒一采麟以文學行治擢置侍
從今爲集賢直學士朝列大夫張泮樂城人元史無
傳此碑及至大二年王思廉撰樂城縣學田記皆云
字子惠縣志作惠伯者誤楊文郁元史無傳成宗本
紀大德二年正月以翰林王惲閭復王構趙與巖上
之綱楊文郁王德淵集賢王國宋渤盧摯耶律有尚

李泰郝采楊麟皆耆德舊臣清貧守職特賜鈔二千

一百餘錠

案本紀郝采楊麟當
印郝采麟陽字衍文

又濟陽縣志載李謙

撰文郁神道碑云文郁字從用號損齋濟陽人天資

穎悟耽時讀書殆若夙昔父最鍾愛嘗會賓客漫取

漢書命讀之句讀分明音吐閑暢一座傾嘆及長寄

興琴書不問生產按察使陳祐聞其名貢諸朝除闕

里教授歷官翰林承旨卒謚文安爲文有根據不事

華藻所著有林下集案林下集今散佚不存元文類

惟載賀千秋牋及賀冊后表二篇又山左元碑文郁

篆額者甚多而陶九成書史會要竟未齒及何耶

常山貞石志卷十六